

10 AUG 1997

Abdullah-Madani (Bergambar)

HAYATI SEJARAH KEMERDEKAAN ANTARA FAKTOR MASYARAKAT MADANI, KATA PAK LAH

KUALA LUMPUR, 10 Ogos (Bernama) -- Penghayatan terhadap sejarah kemerdekaan negara, dasar perkongsian kuasa antara kaum, peranan agama dalam masyarakat serta pemahaman konsep Dasar Ekonomi Baru dan Wawasan 2020 adalah antara faktor bagi membentuk masyarakat madani.

Naib Presiden Umno Datuk Abdullah Ahmad Badawi yang merumuskan kesemua faktor itu pada konvensyen "Reformasi Budaya Ke Arah Pembentukan Masyarakat Madani" di sini, hari ini berkata reformasi bagi pembentukan masyarakat madani bagaimanapun tidak akan berjaya sekiranya ia dilakukan dengan cara yang tidak ikhlas.

"Masalah akan timbul apabila `cakap tidak serupa bikin' atau `lain cakap, lain buat'. Kadang-kadang apa yang dibuat adalah bertentangan dan merosakkan apa yang telah diatur," katanya pada konvensyen anjuran Majlis Ehwat Agama Pergerakan Pemuda Umno.

Abdullah, yang juga Menteri Luar, berkata perjuangan pemimpin awal bagi mendapatkan kemerdekaan daripada penjajah dan kemudian disambung oleh pemimpin seterusnya yang membangunkan Malaysia hingga ke tahap sekarang adalah semata-mata bagi rakyat memperoleh apa yang dinikmati kini.

Bagaimanapun, katanya, kemerdekaan dan kedaulatan yang dicapai itu tidak akan bermakna jika rakyat hidup dalam keadaan rendah martabat dan lemah dan akhirnya ditindas seperti yang dialami oleh rakyat di sesetengah negara.

Abdullah berkata, dasar dan prinsip yang diperkenalkan kerajaan sejak terbentuknya Malaysia seperti perkongsian kuasa, Dasar Ekonomi Baru (DEB), Rukun Negara dan yang terbaru cabaran Wawasan 2020 adalah penting difahami semua rakyat.

Katanya, dasar perkongsian kuasa antara kaum yang diamalkan di Malaysia menunjukkan sikap muafakat dan toleransi yang sering menarik minat negara lain untuk dicontohi.

DEB pula dirangka dengan tujuan mengukuhkan muafakat dan persefahaman antara kaum dan "bagi memastikan rakyat aman, tiada pertempuran sesama sendiri sebagai asas membina bangsa Malaysia yang kuat dan maju," katanya.

Abdullah berkata masyarakat Madani akan tercipta dengan sendirinya dengan cabaran yang ditetapkan Perdana Menteri Datuk Seri Dr Mahathir Mohamad dalam Wawasan 2020.

Katanya, dalam membentuk masyarakat madani orang Melayu perlu menjadikan agama Islam sebagai pegangan, bagaimanapun sikap ekstrim dan chauvinis dalam agama perlu dielakkan.

Sementara itu, Pengerusi Majlis Hal Ehwat Agama Pergerakan Pemuda, Ruslan Kassim dalam kertas kerjanya pada konvensyen sehari itu, berkata gerakan reformasi bangsa Melayu boleh dibahagikan mengikut format reformasi jiwa dan minda, reformasi kepimpinan bangsa dan reformasi kerangka ekonomi.

Gerakan reformasi Melayu pada akhir abad ini perlu berdasarkan semangat keagamaan seperti yang pernah dilakukan oleh gerakan reformasi awal abad, katanya.

Beliau berkata bagi mencapai gagasan Melayu Baru, gerakan reformasi memerlukan penampilan barisan kepimpinan yang berkarismatik dan mempunyai pengalaman luas.

Pengerusi Panel Perunding Institut Kajian Dasar, Prof Madya Dr Siddiq Fadhil dalam kertas kerjanya berkata persepsi masyarakat tentang budaya harus dibetulkan bagi menghindari pendangkalan budaya yang semakin membimbangkan.

Katanya, institusi kebudayaan yang ada kini perlu keluar dari "tempurung seni tarian dan nyanyian" bagi pembinaan budaya yang lebih luas.

-- BERNAMA

RAZ AKD